

Visoki predstavnik se susreo sa predstavnicima udruženja porodica iz Srebrenice

Prilikom susreta sa predstavnicima udruženja porodica iz Srebrenice koji je juče u poslijepodnevnom satima upriličen u Sarajevu, visoki predstavnik, Christian Schwarz-Schilling potvrdio je kako već duže vrijeme sa velikim ličnim interesovanjem prati napore koje ljudi iz Srebrenice ulažu u potrazi za pravdom.

Visoki predstavnik je naglasio da je otkrivanje istine o svim počinjenim ratnim zločinima glavni dio nastojanja da se u Bosni i Hercegovini osvari mir i pomirenje. "Od ključne važnosti za ovaj proces je da se odgovorni za zločine izvedu pred lice pravde, te da se izvrši ekshumacija i identifikacija osoba koje se još uvijek vode kao nestali kako bi se porodice mogle na dostojanstven način oprostiti od svojih mrtvih", rekao je visoki predstavnik.

Visoki predstavnik je izrazio svoju punu podršku Odboru Fondacije Srebrenica u njegovom radu. Visoki predstavnik je ujedno pozvao udruženja porodica da predoče svoje ideje o budućoj strukturi Fondacije, te im je poručio da moraju lobirati na svim nivoima vlasti kako bi osigurali zastupljenost svojih interesa.

Visoki predstavnik je takođe pojasnio da teret ovih napora ne smiju u potpunosti snositi oni koji su direktno pogođeni dešavanjima iz jula 1995. godine. "Bh. institucije moraju preuzeti odgovornost za pružanje pomoći osobama koje su preživjele srebrenički masakr", rekao je visoki predstavnik. "Ovim užasnim dešavanjima ne bi se trebali baviti samo oni koji su direktno pogođeni – općinske, entitetske i državne vlasti moraju istupiti i preuzeti svoj dio odgovornosti za

ostvarivanje napretka u Srebrenici.” Visoki predstavnik je rekao i to da “nadležni organi imaju obavezu da se bave stanjem koje je posljedica užasnih dešavanja koja su se odigrala u i oko Srebrenice, ali isto tako su obavezni da pruže punu podršku onima koji su odlučili da se vrate u ovo područje.”

Visoki predstavnik se obavezao da će posjetiti Memorijalni centar u Potočarima kod Srebrenice kojom prilikom će se ponovo susresti sa predstavnicima porodica. “Kada krajem mjeseca budem posjetio ovaj kraj, namjera mi je da saznam više o problemima sa kojima se suočavaju povratnici i šta lokalne vlasti čine na rješavanju ovih problema”, rekao je visoki predstavnik.